



2015

ONTARIO GAA-WII-AYIZHIID JI-ONJI-ZHOONIYAAKED INI ASINIIN 2015 IZHISEG - GAA-DAKOOSING DIBAAJIMOWIN

Nanaandonewaa asin ji-gagwe-mikigaadeg aaniin ge-gii-onji-zhooniyaakeng, awashime 70,000 awiyag anokii'aawag, ngojigo \$11 billion dasowaabik ondizim endaso-aki gaye dash awashime 1.6 endaso-ngodwaak omaa Ontario GDO izhise. Gichi-inendaagwan Ontario ji-gagwe-onji-zhooniyaakeng asiniikewining ji-onji-minoseg zhooniyaakewin gaye dash ji-ondaadizing ginwesh, gaye dash ji-mino-doojigaadeg aki aaniish da-ondaadiziwag gewiinawaa ge-ani-ayaawaad ani-akiiwang.

Niibiwa gidayaamin wenoodiziwin anaamakamig daabishkoo baatinam gaa-izhinikaadeg asin, gaye naanobiwaabikoons gaa-onji-ozhi'ind, gaye koobaant gaa-izhinikaadeg, gaye ozaawizhooniyaa, gaye zhooniyaawaabik, gaye mashkawi-asin, gaye niibiwa iwe kanooma'id ga-izhinikaadeg. Gi-gashkitoomin gaye ji-moona'asiniyang aazha aaniish 125 daso-biboon iwe gidizhichigemin.

Aaniish naa asiniig gidoonji-ozhitoomin niibiwa gegoo daabishkoo ini mamaandaawaabikoon gaye gichi-waakaa'iganan gaa-ishpakidegin ishping, gaye waasigan gaa-onji-bimibizowaad odaabaanensag, gaye ini gaa-babaamiwijigaadegin giigidowinan - gaye gegoonan mashi gaa-gikendaziwang ge-aabajitooyang mashi - apane go gi-ga-andawendaamin.

Da-onizhishin gii-moona'asiikeng omaa Ontario.

Daabishkoo dash gaa-izhiseg miziwe agaamakiing, niibiwa gegoo gi-zanagendaamin, daabishkoo gii-niisagindeg gegoo noongom bekish dash gii-ishpagindeg gaa-aabadak ji-bimibidechigaadeg, gaawiin gaye aapiji debisesinon ge-danakamigak, gaye e-debisesigwaa igi gaa-nagajitoowaad iwe dinookaan anokiiwin.

Mii dash gaa-onji-maajitoowaang Ontario Gaa-wii-ayizhiid Ji-onji-zhooniyaaked ini Asiniin 2015 Izhiseg gaa-izhinikaadeg e-wiindamaang aaniin ge-ayizhiiyaang 10 midaaso-biboon izhiseg, e-gii-dagonamaang enendamowaad Anishinaabeg, Wiisaakodewininiwag, gaye gaa-naagajitoowaad nanaandasiniwewin, gaye moona'asiniwin gaa-bimiwidoowaad, gaye nanaandosiniwininiwag gaye giwedonong gaa-dazhiikewaad gaye gaa-anokaadamowaad ji-gikenjigaadeg aaniin enishkigaadeg aki.

Ontario Gaa-wii-ayizhiid Ji-onji-zhooniyaaked ini Asiniin 2015 Izhiseg ni-maajii-waabanda'iwemin ezhinamaang: ji-niigaaniyang miziwe akiing ji-ayaayang asiniikewin. Gi-ga-waabanda'igoom aaniin ge-izhinaagwak enendamaang ji-minoseg asiniikewin ji-aada'ongwaa awiyag miziwe.

Niiwinoon ge-biminizha'igaadegin gaye midaaso ge-izhichigeyaang. Amii dash owe nitam:

Ji-niigaaniiyang ji-onzhishing gaye ge-doodamang...

- ji-ozhichigaadegin anokiiwinan gaye ji-asind imaa zhooniya ge-aabadizid
- ji-mikigaazod giyaabi asin ge-moona'ond
- ji-metinind nawach bangii zhooniya
- ji-ozhichigaadeg maawach geminoseg gegoo gaye ji-zhooniyaake'idizong

Daa-izhise ji-onji-bichishinzigwaa awiyag megwaa anokiiwaad gaye ji-minoseg aki...

- nawach ji-minosewaad odanokiig ji-mino-ayaawaad gaye ji-bichishinzigwaa megwaa anokiiwaad

Ji-minoseg anokiiwin owe dash onji...

- ji-ozhichigaadeg inaakonigewin ge-onji-gizhaatabi-anokiiwaad, gaye ji-gikenjigaadeg niigaan wegonen geminoseg, gaye ezhinaagwak apane go

Da-izhise ji-ani-michaag owe anokiiwin ji-ondaadiziwaad ge-ani-ayaawaad wedi niigaan...

- ji-zoongitaagoziwaad Anishinaabeg giigidowaad gaye ji-dagwiiwaad ozhichigaadeg anokiiwin
- ji-izhichigaadeg ji-mino-bimaadiziwad ge-anokiiwaad ji-onji-gaanjiseg anokiiwin asiniikewin izhichigewinan.

- ji-ozhi'indwaa ge-anokiiwaad anokiiwang.

Mii dash ezhi-dazhinjigaadegin ini niiwin gegonan, aaniin ge-onji-gizhiiseg nawach gii-gagwe-mikigaazod asin ge-onji-zhooniyaakeng, ji-minochigaadeg inaakonigewin ge-onji-minoseg anokiiwin, ji-gikenjigaadeg aaniin ezhiseg gegoo gaye gakina awiya ji-gikendang ezhiseg, gaye babenak ji-inagindeg gegoo, gaye ji-ayaamagakin anokiiwinan, gaye zhooniya ge-aabadizid ji-dagoshing, gaye ji-gagwe-ozhichigaadeg weshki'ayaamagak izhichigewin geminoseg, gaye ge-onji-bichishinzigwaa odanokiig, gaye ji-manaajichigaadeg gaa-inishkaag aki ji-bekag, gaye ji-zoongitaagoziwaad Anishinaabeg gegoo gii-ikidowaad, gaye ji-mino-dagwiiwaad gewiinawaa.

Gaawin dash nin-ga-gashkitoosiimin ji-bezhigookamaang. Ji-debinamang iwe, ginandawenimigoom gakina - Anishinaabeg, gaye igi gaa-anokiiwaad asiniikewining, gaye gichi-gikendaasoowigamigong gaa-ayaawaad gaye ogimaawiwiniin - ji-wiidanokiimidiyang.

